

夷

堅

志

夷堅丁志卷第三 十七事

武師亮

撫州金谿主簿武師亮秩滿泊家 近村龍首
院夜有擲瓦擊牕者疑寺僧所爲旦而詰之僧
不敢對徐言曰此邑三郎神響跡昭著得非有
所犯乎武永信明日行廊廡間瓦礫從空而下
紛紛不絕時方雪作而擲者皆乾殆若古墓中
物武始懼召僧誦經禱謝怪亦然至飛石滿磬
其父取一磚題誌擲而祝曰果觸犯三聖願復

以來頃之再至題處宛然不得已自東廂遷於
西以避其怒行李未定擾擾如初乃盡室入邑
中寓妙音道觀怪益甚呼道士設醮致敬略不
爲止武怒呼神名詬之曰汝爲神當聰明正直
何暴我如是吾之待汝亦至矣曾不少悛恣具
邪恨自今以往吾不復畏汝矣語訖音響寂然
先是家之箱篋雖無鎖鑰者亦如爲物所據牢
不可啓是日開闔如常石害遂息

王通判僕妻

撫州王通判家居疎山寺其僕之妻少而美寓
士周舜臣深屬意焉而不可致會王遣人篝火
扣門邀周夜話及開門乃僕妻也顧周笑吹燈
滅相隨以入曰非通判招君我作意來此爾周
不勝愜適遂留宿明日再相逢漠然如不識面
頗怪之又疑與疇昔 夜所合者肥瘠不類至
夜復來不敢納堅不肯去天未明忽不見周密
扣寺僧蓋鄰室有婦人敢樞旋得病月餘乃愈
蔡子思教授者聞之特詣其室焚香致禱求一

見欲詢鄉里姓氏爲誰將爲訪其家寂無所覩

雲林山

臨川徐彥長居金谿雲林山下妻黨倪氏訪之
宿於外室時天雨晦冥夜半後有物推門門即
開徑入踞爐吹火明而坐倪從帳間窺之似羊
有髯遍體皆濕下床叱之物躍起仆於倪身倪
大叫走出得脫不知何怪也

孫光祿

鄭人贈光祿大夫孫俱卒其家卜地以葬長子

恪夢與弟河東尉悚侍父及客張彥和者同游
山寺光祿令煮麪恪辭以飽彥和亦不食而起
獨悚與對食食罷光祿曰此去小梅山只四五
里耳彥和曰幾有十里光祿曰然蓋楊妃村只
四五里也夢後十日河中報悚訃音至亦相從
卜葬正與光祿同日既過墳寺寺僧饌麪以供
兩靈几宛然夢中事也墓在小梅山南相去十
里又四里有楊家莊云

江致平

江致平與能相老翁 翁忽告之曰君何爲作
損陰德事不一年死矣江吉人也應曰吾安得
有此翁 試思之江曰自省無他惡但昔年爲
試官時 一親舊在高等其 有私罵獨此事
耳 曰是也君以一已好惡而私天爵以授人
其不免矣未幾而卒嗚呼世人之過倍 公万
万者比肩立可不懼哉

嵩山竹林寺

西京嵩山法王寺相近皆大竹林彌望不極每

當僧齋時鍾聲隱隱出林表因目爲竹林寺或
云五百大羅漢靈境也有僧從陝右來禮達磨
道逢一僧 吾竹林之徒也一書欲達于典座
但扣寺傍大木當有出應者僧受書 到其

處深 茂竹無人可問試扣木爲一小行者出
引以入行數百步得石橋度橋百步大剎金碧
奪目知客來迎示以所持書知客曰渠適往梵
天走齋少頃歸矣坐良久望空中僧百餘駕飛
鶴乘師子或龍或鳳冉冉而下僧擎書授之且

乞掛搭堅不許復命前人引出尋舊路以還至
石橋指徑令獨去才數步反顧則峻壁千尋
喬木參天了不知寺所在

陸仲舉

大觀中太學生陸仲舉因上書論事屏出學後
復游京師夢神告云汝當發跡何不上書明夜
再夢陸以嘗坐此謫殊不信乃遷舍避之是夜
又夢猶木謂然走謁故人高伸尚書丐歸資相
見甚喜留之宿翌旦朝回謂曰天覺極惱人

作典令吾爲校證官陸曰此乃周官六典中
一事耳何不便作六典而獨舉其一耶伸曰君
好作一書言其事陸始思神言亟草書論之伸
命楷書吏立謄寫以入遂得迪功郎時張天覺
爲相

洛中怪獸

宣和七年西洛市中忽有黑獸髣髴如犬或如
驢夜出晝隱民間訛言能抓人肌膚成瘡痂一
民夜坐簷下正見獸入其家揮杖痛擊之聲絕

而仆取燭視之乃幼女卧於地已死如是者不一明年而爲金虜所陷

翁起予

翁起予商友家於建安郭外去郡可十里上元之夕約鄰家二少年入城觀燈步月松徑行未及半遇村夫荷鋤而歌二少年悸甚不能前但欲宿道傍民舍翁扣其故一人曰適見青面鬼持刀來一人曰非也我見朱鬣豹禪持木骨朵耳翁爲證其不然明且方入城其說青面者不

疾而卒朱鬣者得疾還死于家翁獨無恙

胡大夫

常州人胡大夫爲信州守方交印廳事大梁迤
迤有聲呼匠升屋相視將加整葺梁折廳摧壓
死者數人不越數日胡疽發于背堂中湯爐內
灰火無故飛揚遍滿一室巨蛇垂頭梁上呱呱
作兒啼胡病三日而卒

右十事皆鄭人
孫申元翰所錄

窓櫺小婦

常州宜興僧妙湍掌僧司文籍與其葦二人以

歲暮持簿書赴縣審核宿于廡下空室三僧同
榻二僕在門外已滅燭就枕湍善鼓琴暗中搏
拊不止二僧亦未交睫聞有敲窓者問之不對
以爲小吏故作戲耳少焉一聲劃牕甚響僧起
再明燈即升榻望窓紙破處有婦人小面正可
標間良久入卓上立形體悉具僅高尺餘僧喚
僕不應密相與計此亦無足畏俟其至前則兩
人執之一人啓門呼僕入五男十當一女鬼便
可成擒也婦人稍下據倚坐已與常人等遂揭

帳而登僧始聳然如體挾冰霜不暇施前策婦
人忽趨而下自爲揜帳取鉢便溺其勢如傾斗
水退至火邊大聲吼雷從地起物與燈皆不見
湍琴猶在膝驚鼻定方復起共坐達旦明日告
邑胥皆莫如何怪其室今爲吏舍云

韶州東驛

王行中 凡克中自撫州金谿携僕卒十餘人
往廣州省其父過韶州東境將入驛驛卒白此
有所謂七聖者多爲往來之害不若詣旅邸安

靜無事行中以謂卒憚於供承故妄言恐我且
吾一行不爲少止有物怪豈不能禦竟宿焉衆
僕處外三僕在堂夜且半內外諸門忽同時洞
開燈燭陳列行中又疑爲盜杖劍膝上須其入
而殺之克中但蒙被坐誦楞嚴呪良久聞堂上
兵刃戛擊其呼譟應和之聲全與世間惡少年
所習技等行中窺于門見七男子被髮袒裼各
持兩刀跳擲作戲始大懼徑登床伏于几後衆
鬼入室盡挈箱篋出并帳亦制去取行庖食物

啖嚼又竊窺之已斷三僕首并手足肝肺分挂
四壁益駭怖不敢復開目漸亦昏睡俄鄰雞再
唱寂不聞聲心稍定天明而起則籠帳之屬元
不移故處三僕悉無恙略述所見頗同但不深
記屠割時事其宿于外十輩亦有被此害者雖
皆不死而神氣頓癡顏色枯悴蓋血液已失故
也克中仕至肇慶通判行中爲廣西幹官而卒

海門鹽場

通州海門縣監鹽場劉某生一男夜睡驚啼父

母往視見兒頭上有泥捻饅頭兩枚揮去之兒
即愈它日復然自是常置坐側或與乳媼介麴
則怪復至劉知崇所爲責之曰汝能爲怪胡不
施吾大婦問但困嬰孩何也是夜故出宿外舍
以驗之明旦起枕席及蹋牀上凡列泥饅頭三
十餘大小各異又衣服器皿之類多無故而失
訪之無蹤婢妾良以爲苦一日守門者語老僕
曰兩泥童入宅甚久可以遣出僕入白之元無
有也少頃門者見其出即隨逐之過牆角小廟

而隱劉具香酒詣其處禱曰自居官以來於事
神之禮無所曠何乃造妖如此今與神約能悉
改前事當召僧誦經辦水陸供以資冥福不然
投偶像於海中焚祠伐樹二者唯所擇再拜而
退才還家前後績失衣皿六十種宛然具存兒
疾亦不作劉滿秩善去代者到郡郡守田世卿
招飯席間話此事至暮更衣久不返遣官奴就
視已仆地氣絕呼醫拯療中夕始甦既之官兩
子併夭世卿聞彼大樹起孽命卒伐爲新劉氏

免其禍而代者當之爲可憐也

揚州醉人

建炎二年鄭人孫宣仲甫侍父大夫君格如揚
州舍於旅邸周官人者亦寓焉一客醉且狂從
外來踞肆邸內出穢惡語周指孫居室謂曰此
官貞性猛厲將執汝盍去之客愈喧訥不可禁
良久大夫君出謁宣仲獨守舍客徑入室解索
縛宣仲於案時羣僕悉出無救解者周生亦閉
戶客忽自捨去登高橋語行人曰我適詣某店

遭孫大夫父子困辱無面目見人遂取腰間小佩刀刺喉下立死邏卒以告兵官亟逮捕孫周諸人至且將驗視死者俄而復蘇能言自索紙對狀云實以醉後狂言元未嘗爲孫氏所辱橋上云云亦不能記皆身之所爲他人無預也於是盡得釋其人旋踵竟死非生前一狀孫幾爲所累云

海門主簿

通州海門縣主簿攝尉事入海巡警爲巨潮所

驚得心疾謂其妻曰汝年少入子弱柰歸計何
妻訝其不祥簿曰有婦人立我傍求緋昔子宜
即與妻縫緋紙製造焚之明日又言渠甚感激
但云大一裾耳妻詣昨焚處檢視得於灰中未
化也復爲製一衣簿時時說見人從竈突中下
而居室相去遠目力不能到凡月餘預以死日
告妻奄忽而隕官舍寓尼寺妻不勝懼倩兩尼
伴宿才過靈幃前一尼遽升几坐作亡者語且
命邀邑宰孫愬孫來與問荅甚悉又數小吏某

人之過乞箠之孫如其戒而諭以理曰君不幸死亦命也眷眷如是何得超脫爲邀僧惠瑜說佛法經一日尼乃醒及喪歸又對衆附語令其妻欲嫁則嫁切不可作羞汙門戶事吾不怨汝人或疑小吏之故云

南豐主簿

閩人王某名不欲爲南豐主簿惑官奴龍瑩遣妻子還鄉獨與瑩處知縣孫慤諫止之不肯聽終竊負以逃繼調湖南教授瑩隨之官飲食菜茹

皆資於外庖一日瑩携粥來勤渠異常時王未暇食忽有煤塵落盃內命撤之瑩曰但去其汚處足矣何必弃強王必使食王怒曰旣不以爲嫌汝自啖之瑩亦不可王愈忿適一犬自前過乃翻粥地上縱使食須臾間犬吐黑血宛轉而死王詰其事瑩曰粥自外入非知其然也命呼庖者庖者曰每日實供粥旦獨却回云宅內已自辦之元粥尚在可具驗也遂窮搜室中得所煮鉢瑩始色變執送府訊鞠服與候兵通欲寘

藥毒主翁然後罄家貲以嫁及議罪以未成減
等杖脊而已此可爲後生之戒非落塵賜祐王
其不免

謝花六

吉州太和民謝六以盜成家舉體雕青故人目
爲花六自稱曰青師子凡爲盜數十發未嘗敗
官司名捕者踵接然施施自如巡檢邑尉數員
累共集近舍窮索之其黨康花七者家已豐餘
欲洗心自新佯爲出探官軍密以告尉尉孫革

又激諭使必得遂斷其足來乃遣吏護致扣其平生自言精星禽遁甲每日演所得禽名視以藏匿如值畢月烏則以月夜隱於烏巢之下值房日兔則當晝訪兔蹊往來若與本禽遇則必敗家居大屋而多棲止高樹上是時與康一同行劫事既彰露課得背火猴乃往水濱猴獵所常游處忽一猴過焉甚惡之明日復得前課又明日亦如之而猴無足知必無脫理見康七來疑之欲引避爲甘言所啖又念相與爲盜十年

不應遽賣我纔相近右足遂遭斫尚能跳行數
十步得一草藥解止血定痛救以裹斷處又行
百步痛極乃仆今無所逃死也是年會赦亦以
一支折得故歸今猶存雖不復出但爲羣盜之
師鄉里苦之

右七事
孫華說

夷堅丁志卷第三

夷堅丁志卷第四 十四事

孫五哥

鄭人孫愈王氏甥也年十八九歲時到外家與
舅女真真者凭闌相視有嘉耦之約歸而念之
會有來議昏對者母扣其意云如真真足矣母
愛之甚亟爲訪于兄兄言吾數壻皆官人而甥
獨未仕若能取鄉薦當嫁以女愈本好讀書由
此益自勤苦凡再試姑蘇輒不利女亦長大勢
不可復留乃許嫁少保趙密之子愈省兄懇于

臨安因赴飲舅氏真真乘隙垂淚謂曰身已屬
他人與子事不諧矣愈不復留即還崑山故居
遇姪革於道邀同舟問之曰世俗所言相思病
有之否我比日厭厭不聊賴腸皆掣痛如寸截
必以此死革宛轉尉解且謂之曰叔少年有慈
親而無端戀著如此豈不爲姻黨所笑旣至家
館革于外舍愈宿母榻半夜走出呼革起曰恰
寢未熟聞人呼五哥愈弟視之則真真也急下
牀茫無所覩此何祥哉革留旬日過臨安適真

真成禮於趙氏次日合宴恍然見人立其旁驚
曰五哥何以在此便得疾踰月乃瘳是時愈已
病羸瘠骨立與母謁暨蘇城及門爲母言此病
最忌噦逆及嘔血若證候一見定不可活語畢
忽作惡吐鮮血數塊而死方女有所見之夕愈
尚無恙豈非魂魄已逝乎後生妄想不識好惡
此爲尤甚故書以戒去女今猶存

司命府丞

王全字子真鳳翔陽平人其父登科兄弟皆爲

進士筌獨閑居樂道一日郊行憩瓜圃間野婦
從乞瓜乳齊於腹筌知非常人問其姓曰吾蕭
三娘也筌取瓜寘諸橐以遺之婦就食輟其餘
曰爾可嘗乎筌接取而食無難色婦曰可教矣
神仙海蟾子今居此當度後學吾明日挾汝往
見及見海蟾曰汝以夙契得遇我命長跪傳至
道授丹訣戒以積功累行遂還家白母遣妻歸
周游名山一時大臣薦其賢賜封沖熙處士元
符三年再游茅山先是中峰石洞忽開真誥所

華陽洞天便門者也一閉千歲矣又甘露
降道士劉混康曰必有異旣而筌乃來受上
籙是夕仙樂聞于空浮之上留踰歲晝夢二天
人與黃衣從者數百乘擁白霓來迎跨虎而行
登危躡險由中峰入石洞向所開便門顧視左
右金庭玉室兩青衣童入通見茅君再拜謁君
問勞甚厚曰帝已勅汝華陽洞天司命府丞因
賜金尺以還及寤別混康曰吾數將盡且有所
授從此逝矣下投道人葛沖曰敢以死累公預

言八月十七日當解化及期其衣冠端坐而卒
時建中靖國歲春秋財六十一

劉士彥

劉士彥自睦州通判替歸京師棧舟宿泗間遇
乞人年可千七八目莖脣朱光采可鑑異而問
之對曰吾賣豆每粒千二百錢劉曰吾適乏錢
只有所衣綿襖以奉償如何曰固可也客取豆
以紙一幅於兩乳間擦摩之輒有黑豆數粒出
一與劉擲其餘汴水中劉欲吞之曰未也又

曾掖間復有菜豆數粒出亦取一與劉而擲
其餘劉併吞二豆畢與所許衣笑而不取劉始
病盡不能食即日食如初而益多後面色如丹
但每歲一發渴必飲水數斗覺二豆在腹中如
棗大乞人又約某年相見於淮西不知如何也
右二事見
休集

蔣濟馬

乾道七年秋大饑江西湖南尤甚民多餓死入
年春邵州遣吏蔣濟往衡山岳市朴硝等物

造甲乘馬以行緣道踐人田或以米飼馬二月二十七日至衡山境內櫟岡忽天色斗暗不辨人物雷聲大震良久晴濟與馬皆仆地死矣邵州以事申轉運司轉運判官陳從古揭榜一路以示戒

皁衣髻婦

婺源士人汪生乾道六年春過常州宜興爲周參政館客季冬之夕有婦人自外來通身昏黑衣頂爲兩髻貌絕美手捧漆拌拌中盛果饌別

用一銀杆貯酒徐步至前曰夫人以天寒夜長
念先生孤坐令妾進酒汪且喜且疑謂夫人不
應深夜遣美妾獨出豈非宅內好事者欲試我
歟然服飾太古似非時世裝二者皆可疑不敢
舉首亦不飲婦人曰此酒正爲先生設何所嫌
言之再三汪遂飲猶未半婦人自取果恣食又
浪嬉笑通綢繆之意汪始愧恐放酒走出良
久復入焉一無所見明夜其來如初至于三汪
不得已悉所見白周公公曰家間尋銀杆無處

所方以責婢僕得非怪邪命遍索幽隱至酒室
見古鐺甚朴枌杓皆在內周曰必此物也舉其
腹視之乃唐乾封年造即碎之自此無所覩

汪說

沅州秀才

沅州某邑村寺中僧行者十數輩寺側某秀才
善妖術能制其命凡僧出入必往告得覲施必
中分不然且受禍雖雞犬亦不可容紹興三十
年客僧旦過方解包會鄰村有死者急喚僧誦
經入殮時寺衆盡出唯此客獨往得錢七百以

還既而衆歸知是事相顧嗟愕至暮悉捨去客
不悟也飢甚入厨取食畢自閉三門升佛殿
坐佛脚下以袈裟蒙頭誦楞嚴呪夜過半迅雷
一聲起霹靂繼之而窓櫺間月色如晝俄聞鈴
鐸音若數壯大負巨欲上復下如是三四反
又若失脚而墮遂無所聞天明出視得四紙
人於階下旁一棺亦紙爲之漫摺於懷中少頃
衆至見之驚爭問夜所覩具以本末告之且云
彼人習邪法既不能害人當自被其害試共往

扣則秀才果已斃四體如刀裂寺以告縣遣巡
檢索忠者體究其事云

王允
老說

德清樹妖

宋安國爲浙西都監駐湖州其行天心法猶不
廢德清民家爲崇擾邀宋至其居治不効更爲
鬼挫辱宋忿怒謂近村道觀齋戒七日書符誦
呪極其精專乃仗劍被髮入民居後大樹下禹
步旋繞忽震雷從空起樹高數丈大十圍從頂
至根析爲兩又震數聲枝榦無巨細皆劈裂如

箕籌堆積蔽地怪遂掃跡

郭簽判女

湖州德清縣寶覺寺頃有郭簽判敢女拒於僧
房出與人相接大爲妖害後旣徙葬而物怪如
初寺中局此屋三間不敢居久之侍衛步軍遣
將卒來近郊牧馬宗室子趙大詣寺假屋沽酒
僧云無閑舍獨彼三間以鬼故不爲人所然
非所以處君也趙曰得之足矣吾自有以待之
即日啓門通三室爲一正中設榻枕劒而卧夜

漏方上女已颯然出豔妝鮮服立於前趙曰汝
何人何為至此笑而不言問之再三皆不對趙
遽起抱之頗窘畏為欲去之狀俄頃間如煙霧
而散懷中了無物自是帖然趙居之十餘年不
復有所覩

鎮江酒庫

歐陽當世為鎮江摠領所酒官以酒庫摧陋買
民屋數區即其處撤而新之時長沙王先生赴
召過鎮江其人精治案牘不假符水呪被蓋

自能默覩歐陽遇之於府舍即謁邀至新居

具食以待扣之曰此地有鬼物乎曰有二鬼一以焚死一以縊死然皆畏君不敢出但一大蛇枉死不知其故當令君見其形左右聞者毛悚飯罷王語主人可視壁間視之蛇影大如椽長袤丈自東而西乃具詢主吏對曰一酒匠因丞酒墮火中一庫典以盜官錢自盡而不能記蛇

事云

右三事皆歐陽
携說此其父也

胡教授母

處州胡教授母年九十而終前兩日何人來與
語使之告世人云大鼓不鳴溪水不流六月降
霜蘆沉石浮聞隔寒泉高山一丘且言冥司處
處令人報世間公直爲上勿攘田土錢物見專
治此等事更有數語傳者以爲不可載時乾道
八年何德揚說

戴世榮

武翼郎戴世榮建昌新城富室也所居甚壯麗
紹興三十二年家忽生變怪每啓房門常見杯

拌殺饌羅列地上羣犬拱立于傍篋中時時火
作燒衣物過半而篋不壞妻趙氏在寢覺牀側
如人擊破瓦缶數枚者一室振動塵霧湔然尋
即卧病或擲甌石器物從空而下門閤窓柱敲
擊不暫停其音亦錚淙可愛驗擊處皆如繭栗
痕歷歷可數醫者黃通理持藥至奪而覆之倉
黃却走飛石搏其腦立死巫者湯法先跳躍作
法爲二圓石中其踝匍匐而出僧志通持穢跡
呪結壇作禮未竟遭濕沙數斗壅其頭項幾至

不免親戚來問疾者慮有所傷敗皆面辟而行
百種襁褓無少効趙氏以所受張天師法錄鋪
帳頂裂而擲之地竟不起世榮足患小疽遭怪
尤甚乃取魚網離地數尺徧布室中以避投石
之害猶擲於網之下不已相近三二十里人家
盆櫟陶器無一存者皆不知所以失蓋其日夜
所擊之物也世榮疾篤見異物立延下馬首赤
鬚長丈餘須臾首漸低大吼一聲拏空而去不
數日疽潰而死家遂衰替世永雖富室子然鄉

里稱善人殊文測所以致怪也不趙氏兒善羊說

京西田中蛇

河中府老兵胡德壯年往京西捕盜晝過村野遇大蛇於麥壠中昂首疾行麥爲之靡數卒挾槍刺殺之其長丈許分爲十餘齧各挈提以去德取其頭挂于槍行未遠村婦人望見搏膺迎哭曰誰令兒輕出以速死率家人共挽德至所居哀訴且買蛇頭瘞之又一客以端午日入農民家乞漿值其盡出刈麥方小立開屋側喀喀

作聲起而視則有蛇踞屋上垂頭簷間滴血于盆中客知必毒人者默自念吾當爲人除害乃悉取血寘其家壑甕內詣鄰邸以須良久彼家長幼負麥歸皆渴困爭赴厨飲壑汁客飯異復過其門則舉室死矣外舅爲河中教授日胡德爲閭者說此事

建昌井中魚

大觀戊子年七月五日建昌軍驛前大井水連日腥不可飲居民浚治之得一魚可三指大

鯽而眼上赤紋色如金頭有兩角細而堅
貯以巨桶并買楮鏹送于江至暮大風急雨吹
折大木無數皆疑以爲龍類云

王立燒鴨

中散大夫史志自建康通判蒲秩還臨安鹽橋
故居獨留虞候一人嘗與俱出市值賣燒鴨者
甚類舊庖卒王立虞候亦去無小異時立死一
年史在官日猶給錢與之葬矣恍忽間已拜于
前曰倉卒逢使主不暇書謁遂隨以歸且獻梓

中所餘一鴨史曰汝旣非人安得白晝行帝城中乎對曰自離本府即來此今臨安城中人以十分言之三分皆我輩也或官負或僧或道士或商販或倡女色色有之與人交關往還不殊略不爲人害人自不能別耳史曰鴨豈真物乎曰亦買之於市日五雙天未明齎詣大作坊釜竈煑治成熟而償主人柴料之費凡同販亦如此一日所贏自足以餬口但至夜則不說旣無屋可居多伏於屠肆內按下往往爲大

所驚逐良以爲苦而無可柰何鴨乃人間物可
食也史與錢兩千遺去明日復以四鴨至自是
時時一來史竊歎曰吾人也而日與鬼語吾其
不久於世乎立已知之前白曰公無用疑我獨
不見公家大養娘乎袖出白石兩小顆授史曰
乞以淬火中當知立言不妄此媼蓋史長子乳
母居家三十年矣史入戲之曰外人說汝是鬼
如何媼曰六十歲老婢真合作鬼雖極忿愠而
了無懼容適小妾熨帛在旁史試投石於斗中

少頃焰起媼顏色即索然漸益淺淡如水墨中
影忽寂無所見王立亦不復來予於丙志載李
吉事固已笑鬼技之相似此又稍異云
朱椿年說聞之於史

夷堅丁志卷第四

夷堅丁志卷第五 十五事

三士問相

政和初建州貢士李弼翁棗黃崇三人偕入京師游相國寺時有術者工相人平生禍福只斷以數語其驗如神共扣焉曰李君即成名官至外郎翁君須後一舉官亦相次黃君隔三舉乃可了官亦與翁同既而弼案如其言崇蹉跎恰九歲方復獲解入京相者猶在見崇來大呼曰何爲至此崇話疇昔事且言李翁二君已登科

相者曰往來如織安能記省姑以君今日論之
法當得陞朝官以上柰何作不義事謀財殺人
陰譴文重宜速歸非久當死不必赴省試也又
問幾子曰三人曰行亦絕矣崇不樂而退果下
第歸不一年而死三子繼夭妻改嫁其嗣遂絕
初崇母既亡父年過六十買妾有娠臨就蓐崇
在郡學父與崇弟謀晚年忽有此吾甚愧今將
不舉乎或與人乎不然姑養育待其長使出家
若何對曰此亦常理唯大人所命不若舉而生

之兄歸須有以處妾遂生男弟遣信報崇崇即
還揖父於堂父告以前事命抱嬰兒出時當秋
半閩中家家造酒汲水滿數巨桶置廷內以驗
甚滲漏崇以手接兒徑擲桶中溺殺之父救淚
而已蓋黃氏貲業微豐崇畏兒長大必謀分析
故云狀如此且其墮身絕祀也李弼仕至朝奉
郎宗子博士翁案至承議郎台州通判相者可
謂造妙矣

陳通判女

興化陳子輝紹興戊午待南雄通判闕居鄉里
當夏夜家人聚飲其妻顧長女使理樂樂聲失
節怒而叱去之女不復出酒罷問所在得於後
堂空室中對燈把針癡不省事挾與還卧床則
已死氣雖絕而心微溫醫巫拯療不効凡奄奄
百二十日聞泉州有道士善持法招之而至先
以法印印遍體乃召其鬼云爲漳州大廟所錄
後兩夕忽呻吟作聲至旦屈右足呼痛視之一
指破流血正晝稍能開目又明日始言外翁

我去女外家在漳州元未嘗識而說其舍宇不
少差旦云外翁嫁我與大主作小妻受聘財金
釵兩雙臂纏一雙銀十笏錢千貫采帛不勝計
豬羊各二十口酒數十缸我入王宮大人極相
憐每日食飲必三人共坐又令訓諸小婢音樂
留甚久外報家人來欲取我我未欲歸王亦使
逐去比兩日間又報或持官文書督取甚峻王
發怒遣兵扞拒之使者將舉火焚宮通我身皆
火焰王欲相近不復得羣吏曳我以出王索轎

送我輜卒恐懼奔竄不得已獨行山路險确膏
股俱疲過嶺下小石損我足仆地移時至今猶
痛不堪忍自是神采如舊但每至陰雨則小腹
必痛後以嫁迪功郎郭某卒酉歲成昏於南雄
州

四眼狗

建陽黃德琬買一犬純黑而眉下兩點白如眼
然因呼爲四眼居三歲田僕陳六來告曰宅中
衆犬屢齧殺羊驗之而信家凡六犬命悉殺

之勿令遺類以相教習五犬死獨四眼佚去過
兩夕來夢於黃妻云官欲盡殺犬我實無罪平
生不咬羊只在後門夜守賊願免一死妻言之
於黃明日再究詰果不與同類混跡心欲貸之
已復歸矣自是其宿後墻下又七年尚存

師逸來生債

建陽醫僧師逸好負債嘗從縣吏劉和借錢十
千累取不肯償劉憤曰放爾來生債自是絕口
不言後五歲逸死又 歲劉之母夢其來如平

常俯而言曰昔欠錄公錢十貫今日謹奉還遂
去母覺而告劉此何祥也拂旦田僕來報昨
三更白牒生犢

張一償債

建陽鄉民張一貸熊四郎錢兩千子本倍之經
年不肯償熊督索倦矣好與言曰無復較息但
求本錢可乎張愧謝稍以與之竟負元數八百
熊亦不復取三年而張卒卒之四年熊夢張以
八百錢來償置地上皆小錢留與坐啜茶乃去

覺而與妻說方竟一僕扣門曰牛生犢甚大急
欲酒作福熊喜甚僅再旬犢不疾輒死鄰居來
就買熊需兩千屠笑曰是有何所直剥而盡貨
豈不及此數但有鬻牛之名當先以酒及梧羹
啖里正父以餉四鄰乃取其羸今唯有八百錢
幸見付否則已耳解腰間囊擲于地正張生夢
中所償處儼然小錢也熊方悟前事亟與之

吳輝妻妾

紹興甲子五月江浙閩所在大水崇安縣黃亭

鎮人百餘家盡走登扣冰庵以避之門廊堂殿
皆滿建陽人吳輝娶黃亭藍氏端午日妻歸寧
正值水禍同一妾從父母棲于庵之鍾樓睡覺
聞雞鳴則身乃在山上松林中莫知所以能至
迨旦觀之蓋庵後山也妾亦在旁父母與家人
皆不見凡來庵中千口其得生者十之一悉若
虛空中有人送出者庵屋盡為水蕩去地面亦
無復存

句容人

紹興二十一年十二月知建康府王伸道

馱卒往茅山元符宮限回程甚速還次中塗值
夜寒甚望山脚下園屋內爇火亟就之至則村
民七八輩圍守一尸云是人自縊於此室吾曹
乃里正及鄰保懼爲蟲鼠所壞故共守以須句
容尉之來衆或坐或睡馱卒不敢久留獨出行
月色朦朧方前趨而屋內人有相踵者與之語
亦相應荅可二里許正逢一缺溝馱躍而過後
者不能越墜於溝中其聲董然馱回步扶掖則

死矣奔詣道旁舍扣戶告主人曰我欲還府有
山下守尸者相從失足溝中似不可救幸爲語
諸人使視之舍翁燭火以往正見數輩驚遽馳
走言失却死尸聞其報隨以前果得之復昇還
室舉置繩纒中明日尉熊若訥始至蓋強鬼附
尸欲爲厲駛卒亦危哉

荆山莊壘

秦氏當國時金陵田業甚富曰永寧莊者保義
郎劉穩主之曰荆山莊者陳某主之紹興士申

劉因事過陳舍留宿晚如廁見群豬環飲米

爲豬所摩微露黃色扣之則銅也還訪於
陳曰頃以瓦甕或木槽飼豕屢爲所壞前歲耕
夫獲此於上中以米五斗得之質性堅重庶
其可久劉曰我欲買往句容改鑄器玩可乎陳
曰細事耳劉償絹兩匹命僕持歸磨治瑩絜光
采粲然是歲齋租入詣秦府試以獻相君相君
視之乃真金也蓋漢時生金所製重二十四斤
即奏諸御府而厚以錢帛犒劉生

負家犬

賈琦爲建康軍統領官日部有四人善盜晝解人衣夜探雞犬無虛日琦諭隊將戒之貸其前過曰後勿復犯琦家養狗黑身而白足名爲銀蹄隨呼拜跪甚可愛忽失之揭榜募贖凡兩日餘老兵來報四偷方殺狗亨食亟遣驗視狗已熟皮毛儼然琦命虞候泣埋又以灰印印地面使不可竊取窮究曲折果四人同謀二人用索胃之於東門外城下琦責將官猶以已

物使勿深治將官取同謀者杖背五十正盜者
鞭滿百旬日內受鞭者皆死一夕琦門內聞狗
吠聲絕似銀蹄家人皆笑曰豈狗鬼乎呼之即
應及啓門搖尾而入銜人衣且拜且躍悅樂不
勝名狀明日驗瘡處印如初土亦不陷但穴中
空空又疑向所殺者爲他人家畜復具載形色
遍榜外間許人識認亦無尋訪者始知其冤業
所召云銀蹄再活十年方死

威懷廟神

建陽縣二十里間蓋竹村有威懷廟以靈應著
陳秀公升之少年時家苦貧朋友勉以應鄉舉
公雖行而心不樂過廟入謁祝盃筴曰某家貧
今非費數千不可動亦無所從出敢以決於靈
侯舉三投之皆陰也意愈不樂同塗者強挽以
前既入城夢人白言蓋竹威惠侯來相見出延
之其賓主禮神起謝曰公惠顧時吾適赴庵山
宴集夫人不契勘誤發三陰筴公此舉即登科
官至宰相矣公驚寤他日齋戒密往禱得

卜如所占果拔鄉薦明年登甲科爲熙寧相

靈泉鬼魅

王田功撫幹建陽人居縣境之靈泉寺寺前有田田中有墩墩上巨木十餘株徑皆數尺藤蘿繞絡居民目爲鬼魅幽陰肅然亦有歲時享祀者王將伐爲薪呼田僕操斧皆不敢往王怒欲撻之不得已而行繞施數斧木中血流僕懼乃止還白焉王撻其爲首者二人曰只是老樹皮汁出安得血羣僕知不可免共買紙錢焚之被

髮斫樹每下一斧即呼曰王撫幹使我斫竟空
其林得薪三千束時紹興十三年也經月王頊
發於背自言見崇物既死崇猶不去衆爲別裁
木其處以謝之今尉然成林崇始息

魚病豆瘡

溧水尉黃德琬巡警至高淳鎮見漁人棹舟十
數泊岸傍不施罔罟貌有愁色問其故對曰今
歲黃頰魚遭疫皆患豆瘡數日以來無一魚可
黃命取驗之舉罔得數枚熟眎果病瘡正

人所苦無異或遍身或頭尾口眼聞云踰旬方
平復然居人畏有毒不敢食也

石臼湖螭龍

溧水縣石臼固陽湖中淺處有官圩亘八十四
里爲田千頃名曰永豐圩政和以來歷賜蔡韓
秦三將相家紹興二十三年四月爲江水所壞
朝廷下江東發四郡民三萬修築時秦氏當國
州縣用命督工甚整次年四月十二日正晝忽
有巨物浮宣江而下蹙浪蔽川昂首游其間如

蛟螭之類而戴角。村民老弱夾岸呼譟爭撈。罔
罟籃畚循水旁捕魚。邑尉黃德琬適董役見之
問其人皆云螭龍也。或一年或二年或三五年
必一出其體涎沫甘腥。故羣魚逐而啖食。但掠
岸時漁人所獲無百斤以下者。是日此物穿丹
陽湖而去。至歲暮石臼湖水合舟楫不通。月望
夜又一螭自湖中徙丹陽聲如震霆。堅冰裂開
一丈二尺餘。鼓浪亦高。冰破處經兩日不合。乃
知圩隄決潰。蓋是獸所爲也。

陳才輔

建炎末建賊范汝爲葉鐵葉亮作亂建陽士人
陳才輔集鄉兵殺葉鐵父母妻子賊倡蹶益其
紹興元年遂據郡城朝廷命提舉詹時升奉使
謝嚮同招安群盜皆聽命獨葉鐵不肯曰必報
陳才輔乃可出詹爲立重賞擒獲以畀之鐵選
三十輩監守人與錢一千戒之甚至曰失去則
皆斬欲明日邀使者及諸酋高會而甘心焉監
者以巨索縛陳脚倒垂梁間大竹箴拳其手劒

戟成林相近尺許垂一刀甚利至三更衆皆醉
陳默禱曰才輔本心忠孝爲國爲民老母在堂
豈當身受屠害若神明有知願使此曹熟睡刀
自近前爲破索出手使得脫去良久刀果自前
如神物推擁陳以掌就斷其蔑兩手旣釋稍板
援割截繫縛盡斷遂握刀趨門一人睡中問誰
開門應曰我具人不知爲陳也曰不要失却賊
陳曰如此執縛何足慮及出門已三鼓行穿後
巷約一里聞彼處喧呼曰走了賊陳益窘顧路

旁坎下篁竹蒙醫急藏其間而千炬齊發搜
殆遍坎中亦下捨刀百十偶無所傷諸人言必
歸建陽或向劔浦宜分詣兩道把截陳不敢擇
徑路但屈曲穿林莽中明日抵福州古田境賣
所持刀得錢買飯直趨泉州就其姊壻黃秀才
踰八日而十卒持詹君帖至復成擒陳知不免
亟自碎鼻以血汗身佯若且死十卒自相尤曰
柰何使至此扛置邸中真以為困悴不復防閑
又三日黃生來視適茶商置酒招黃及十人者

商家相去稍遠，唯七人往赴，留三人護守。陳又默禱。如曩時，三人皆飲所餉酒，亦醉，買菜作羹，一坐房前，一吹火竈間，一洗菜水畔。陳乘間擣棍棒，揮擊即死。南走漳州，竟得脫。明年韓蘄王平賊，陳用前功，得官。

張琴童

張永年居京師時，值暮冬大雪，家人宴賞，遣小蒼頭曰琴童者，持糖蟹海錯餉三里間親戚家。小兒輕捷，不憚勞，雪中往復三四反，雙足受凍。

色紫黑其母居門首見而念之呼入與湯使淋
洗凍已極不知痛少頃八指悉墮盆中母視之
皮肉皆成冰爲湯所沃故相激而斷此卷皆
黃德琬
說

夷堅丁志卷第五